

Parlamentario Juan David Yrausquin (AVP) ta sugeri pa

Sindicatonan sinta na mesa cu Gobierno pa wak con nan por aporta cu e reto financiero di nos pais

ORANJESTAD – “Diabierna awo nos ta bay tin un presentacion di Banco Central unda ta bay papia ariba nos proyeccionnan economico y financiero pa nos pais pa e añanan venidero,” palabranan di Parlamentario Sr. Juan David Yrausquin di partido AVP.

Sr. Yrausquin ta enfatisa cu e cierre di Valero tabata tin un impacto ariba finanzas publico y nos economia pero tambe lo sinti e impacto ariba e añanan venidero. E informacion cu lo wordo duna na e presentacion di Banco Central, lo ta uno importante pa tanto politico y parlamentarionan pero tambe pa nos comunidad en general, gremionan y sindicatonan.

Segun Yrausquin recientemente el a scucha un declaracion di parti di bloke sindical, caminda cu nan ta bisa cu nan kier papia ariba indexering cu Gobierno. “Nos ta kere cu ta bon pa Gobierno,

gremionan y esunnan sindical sinta na mesa pa papia no solamente di indexering, pero tambe pa wak con sindicatonan por aporta na e retonan economico cu nos pais tin y no pa solamente puntra con nan por mehora e posicion di nan miembronan,” Sr. Yrausquin a bisa.

Pero nan ta pidi pa e sindicatonan especificamente den e bloke sindical, pidi un reunion cu Banco Central pa nan tambe wak e cifranan economico y financiero. Paso segun Yrausquin segun un analisis simpel, cu nan a haci na e presupuesto 2009-2012 ta muera cu na e momentonan aki tin menos empleado publico den servicio di gobierno pero e gastonan di personal a subi cu mas o menos 69 miyon florin. Esaki, segun Yrausquin, ta entre otro pa motibo di indexering cu tabata tin den tur e añanan aki y tambe pa motibo di aumento di salario cu tin di haber cu entre otro

bevoording y periodiek.

“Esaki ta cosnan cu na momentonan cu bo tin retonan financiero cu sindicatonan por sinta na mesa cu Gobierno y wak con nan por yuda e situacion akinan. Y nos ta haci un apelacion na Gobierno pa acerca e sindicatonan cu e reto aki y wak con nan por aporta na e retonan aki di nos pais.

Atrobe nos sa cu e bloke sindical no ta parti di e dialogo social, y temanan entre Gobierno y sindicato di Gobierno no ta wordo discuti pero awor aki basa ariba e yamada cu e bloke sindical a haci, cu nos ta spera cu nan tambe por bay cu e punto di bista di con nan por contribui na e mehoracion di nos finanzas publico. E reto cu Valero a cera su portanan, ta contribui na e retonan financiero di nos pais cu mas o menos 100 miyon florin adicional,” Sr. Yrausquin a bisa. □